

# 1 JUAN

## *Jesucristo ded pah ã jumat*

<sup>1</sup> Ded pah Jesucristo ã jumatjidih yeebdíh wã naóh daácna caá. Jesucristo biíhmah jumni,\* ded pah Dios ã jumatdih naóhni, cãacwã Diosjeéh páantjeh jumat túutnibut ãt jumap wut jĩ. Dios cãacwãdih ded pah ã naáwãtdih Jesúsboó naóh yapani ã jumap jĩ. Æ naáwáchah joinít, jwiítjeh caandíh jwĩ enep jĩ. Jwiít dih ã dáo wáyachah, caandíh jwĩ pej jumap jĩ. <sup>2</sup> Jesucristo cãacwãdih páantjeh jumat túutni, nin baácboó ã jũúwát pínah jãtih ã íp Diosjeéh jumni ni nin baácboó ãt cãac jumap tajĩ. Caandíh ennitji bũũ ãih doonãdih yeebdíh wã naóhna caá.\* <sup>3</sup> Jwĩ íp Diosjeéh, ã wũúh Jesucristojeéhbut jwĩ táí jumna caá. Pánihna, yeéb jwĩjeéh, jwĩ ípjeéh, ã wũúhjeéhbut ñi táí jumat pínah niijná, jwĩ ennijidih, jwĩ joiníjidihbut yeebdíh wã naóhna caá. <sup>4</sup> Bíicdih wẽinit jwĩ jumat pínah niijná, nindih yeebdíh wã daácna caá.

## *Baabát panhipboó jwĩ jumat*

<sup>5</sup> Dios wũúh jwiít dih ã naóhni ni bohéãtdih bũũ yeebdíh wã naóhna caá. Dios táini yoobát jumna, baabát panihni caá. Dedé yéejat wihcah, dupúát caandíh ã wihcan caá. <sup>6</sup> Jwiít yeejép chãjnit, dupúát panhipboó jumna yahna, “Diosjeéh wã táí jumna caá”, niijnít, yeena caá jwĩ chãjap. Dios ã náahat pah jwĩ chãjcan caá. <sup>7</sup> Obohjeéhtih,

\* **1:1** Jn 1.1,4; 6.68; 1Jn 2.13-14      \* **1:2** Jn 1.14,18

túi chãjnit, baabát panihpboó Dios ã jummat pah muntih jwiítbat jumna, ãjeéh jwĩ túi jumna caá. Ñihwãjeéhbat jwĩ túi jumna caá. Caandih jwĩ jepahat jíib, Dios ã enechah, ã wũúh Jesucristo cruzboó wun wũhnit, ãih meépjĩh jwiít dih yéejat wihcannit pah ã chãjna caá.

<sup>8</sup> “Weém bácah yéej chãjni nihcan caá”, niij jenah joinít, yeeatdihjeh jwĩ jenah joiná caá. Páant niij jenah joiná, Dios naáwát dih jwĩ túi jenah joicán caá. <sup>9</sup> Obohjeéhtih, jwĩ yéej chãjatdih Diosdih jwĩ naáwáchah, caandih ã quíib bũudbípna caá. “Dios yoobóp dih jumni ã niiját pah ã chãjbipna caá”, jwĩ niij jéihna caá. <sup>10</sup> “Weém yéej chãjni nihcan caá”, niij jenah joiná, “Dios yeení caá”, niijnít, ã naáwát dih jwĩ náahcan caá.\*

## 2

### *Jesucristo jwiít dih ded pah ã teo wáacat*

<sup>1</sup> Wã weh panihnitá, yeéb yeejép ñi chãjcat pínah niijná, nindih yeebdih wã daác wahna caá.\* Obohjeéhtih, jwĩ yéej chãjachah, Jesucristo, yéejat wihcanni, ã íip dih jwiít dih ã naóh teo wáacbipna caá. <sup>2</sup> Jwiít yéejnit jwĩ jumuchah, jwĩ yéejat Diosdih ã jáhna caá. Dios bíic dih jwĩ túi jummat pínah niijná, Jesucristo jwiít dih ã wun wũhup jĩ.\* Jwiít dihjeh nihcan, nihat baác dih moón jwĩ yéejat dih yohat túut niijná, ã wun wũhup jĩ.

<sup>3</sup> Dios ã wutat pah chãjna, “Ñjeéh wã túi jumna caá”, jwĩ niij jéihna caá.\* <sup>4</sup> Obohjeéhtih, bita “Diosjeéh wã túi jumna caá”, niijná yuhna, ã wutat pah

\* **1:10** Pr 20.9

\* **2:1** Ro 6.11-14

\* **2:2** 1Jn 4.10

\* **2:3** Jn

14.15,21,23

chãjcan, yeenit caá. Pánih yeenit, Dios naáwát dih ï jéihcan caá. <sup>5</sup> Obohjeéhtih, biíhboó ã wutát pah chãjni Diosdih ã túi oina caá. Diosjeéh jwí túi jumát dih nin pah jwí jéihbipna caá: <sup>6</sup> Ded Diosjeéh túi jumni Jesucristo ã chãjatji pah muntih caanbát ã túi chãjbipna caá.

### *Jáap wutát*

<sup>7</sup> Wã oinitá, yeebdíh bũũ wã daácni jáap wutát nihcan caá. Jon jãtíh ñi jéihni wutátjeh tigaá. Yeebdíh Jesúih doonádih jwí naáwáchah, nin wutát dihbut ñi joyóp jĩ.\* <sup>8</sup> Obohjeéhtih, máa wutát yuhna, jáap wutátbut ã jumna caá.\* Cristo nin wutát dih jepahnit, jwiít cãacwãdihbut ã oyat túutap jĩ. Dupúát paníhipboó ñi jumachah, Cristo nin baácna jũóhñit, caán dupúát dih ã baabánap jĩ. Pánihna, ã baabáát paníhipboó jumnit, Cristo ã oyat túúat dih ñi jepahna caá.

<sup>9</sup> “Weém baabápboó jumni Dios ã wutát dih jepahni caá”, niijná yuhna, ã dée paníhni Jesúih dih eníhcan, Dios ã wutát dih jepahcan, dupúnapboó jumni caá. <sup>10</sup> Ded ã dée paníhndih oini baabápboó ã jumna caá. Pánih oina, caandíh dedé bũũgát paníhni ã wihcan caá.\* <sup>11</sup> Obohjeéhtih, ded ã dée paníhndih eníhcan, dupúnapboó ã bejna caá. Pánih bejna, jéih encanni paníhni ded pah ã chãjat dih ã jéihcan caá.

### *Cristodih túi jenah joyát ded pah ã jumát*

<sup>12</sup> Wébítá, Cristo ã wũũ wũhatjĩh ñi yéej chãjat dih ãt yohop taga. Pánih yéejat yohñit ñi jumachah,

---

\* **2:7** 2Jn 5-6    \* **2:8** Jn 13.34; 15.12    \* **2:10** Ro 13.12-14

yeebdíh wã naóh daácna caá. <sup>13</sup> Behnitá, yeéb biíhmahjeh jumni Cristodih ñi túi jéihna caá. Caandíh túi jéihnít ñi jumuchah, yeebdíh wã naóh daácna caá. Japatá, yeéb nemépwã ï maáhdih ñit yap yohop taga. Pánih yap yohnit ñi jumuchah, yeebdíh wã naóh daácna caá.

<sup>14</sup> Wébítá, jwí ípdih ñi túi jéihna caá. Caandíh túi jéihnít ñi jumuchah, yeebdíh wã naóh daácna caá. Behnitá, biíhmahjeh jumni Cristodih ñi túi jéihna caá. Caandíh túi jéihnít ñi jumuchah, yeebdíh wã naóh daácna caá. Japatá, Dios naáwát dih túi jepahnit, wêp ñuhnit panihnít ñi jumna caá. Pánih jumnit, nemépwã ï maáhdih ñit yap yohop taga. Páant ñi jumuchah, yeebdíh wã naóh daácna caá.

<sup>15</sup> Diosdih jéihcannit ded pah ï en ñinahatdih ñi en ñinahca bojoó. Ded queét panihni jwí ípdih ã oican caá.\* <sup>16</sup> Diosdih jéihcannit nin pah ï jumna caá: Yeejép chãjatdih ï en ñinahna caá. Bií déedih wêi ennít, ï bíbohíh jenah joiná caá. Dawá bií déedih bíbohna, “Weém bita chah túini wã jumna caá”, ï niíj jenah joiná caá. Jwí ípboó páant ã jenah joyát túutcan caá. <sup>17</sup> Nin baác ã buudúchah, ded pah cáacwã yeejép ï náah jenah joyátbut ã buudbípna caá. Obohjeéhtih, Dios ã náahat pah chãjnitboó páantjeh ãjeéh ï jumbipna caá.

*Yoobópdih naáwát, yee naáwát*

<sup>18</sup> Wehá, nin yeó jáapna buudát pínah tóah jüóhna caá ã chãjap. “Cristodih tabit en jüihni ã jumbipna caá”, ï niíjíchah, ñiát joiná jï. Pánihna, buu dawá ï jüúwát dih jéihnít, “Péeni yeó jáap bahnijeh ã judhna caá”, jwí niíj jéihna caá. <sup>19</sup> Queét Cristodih en

---

\* 2:15 Stg 1.27

jáihnit jwĩ cãtíh jamna yahna, jwiít dih ï éemp yoh bacap jĩ. Páant ï bacatdih ennit, Jesúihwã yoobát ï nihcatdih jwĩ jéihna caá. Queét áihwã nihna, jwĩjeéh ïta chão tágaá. Jwĩjeéh páantjeh ï jamachah nihna, Cristodih en jáihnit ï jamatdih jwĩta jéihcan tagaá.

<sup>20</sup> Obohjeéhtih, yeebdíh Túini Espíritu ã jamachah, yeéb nihat Cristoíh dooná yoobópdih ã jamatdih ñi túi jéihna caá.\* <sup>21</sup> Yeebdíh naóhna, “Queét ï túi jéihcan caá”, wã niij jenah joicán caá. Obohjeéhtih, túi jéihnit ñi jamachah, yeebdíh wã naóh daácna caá. Caán dooná dedé yeeat ã wihcatdih ñi túi jéihna caá. <sup>22</sup> Nin pah caá yeeni ã niijíp: “Jesús Dios ã wahní nihcan caá”, ã niijná caá. Ded “Jesús Dios wũúh nihcan caá”, niij naóhni Jesucristodih, jwĩ íp Diosdihbut en jáihni caá. <sup>23</sup> “Dios wũúh Jesús nihcan caá”, niijní jwĩ íp Diosjeéh ã túi jamcan caá. Obohjeéhtih, “Jesús Dios wũúh caá”, niijníboó jwĩ ípjeéh ã túi jamna caá.

<sup>24</sup> Yeéb Jesús dih jwíh jepahnit, ded pah ã jamat doonádih ñi joyóp jĩ. Páant ñi joyátjidih ñi túi náhninaá. Pánih náhninit, Jesús dih, ã ípdihbut ñi túi pej jambipna caá. <sup>25</sup> Nin pah Jesús jwiit áihwãdih ã niij naáwáp jĩ: “Yeéb wãjeéh páantjeh ñi túi jambipna caá”, ã niijíp jĩ.

<sup>26</sup> Yeebdíh yeenitdih ñi joyáh bojat pínah niijná, wã naóh daácna caá. <sup>27</sup> Jesucristo yeebdíh Túini Espíritudih át wũhup taga. Ñijeéh jamnit, yeebdíh ã túi bohéna caá. Yoobópdih bohéna, yeeatdih ã naóhcan caá. Páant ã bohénachah, biíh bohénidih

---

\* **2:20** 1Co 2.10-16

ñi náahcan caá. Pánihna, ã bohéatdih joí cádahcan, Cristojeéh páantjeh ñi táí jumúú.

<sup>28</sup> Páant tigaá, wehá, Cristojeéh páantjeh ñi táí jumúú. Pánih jumnit, ã jwúub dei júúwúchah, úumcan, ñi tíccan niít. <sup>29</sup> Jesucristo túini ã jummatdih yeéb ñi jéihna caá. Pánih jéihnit, nihat táí chäjnit Dios weh ï jummatdihbut ñi jéihna caá.

### 3

#### *Dios weh jwĩ jummat*

<sup>1</sup> Jwiít dih bainí oican, “Yeéboó wã weh caá”, Dios ã niijná caá. Æ oinit jumna, jwiít ã weh caá. Pánihna, yéj chäjnitboó Diosdih jéihcan, jwiít ã wehdihbut ï jéihcan caá.\* <sup>2</sup> Wã oinitá, buu Dios weh jwĩ jumna caá. Obohjeéhtih, ded pah jwĩ jummat pínahdih jwĩ táí jéih jwahcan caá. Jesucristo ã jígohochah, caandíh ennit, ded pah ã jummatdih jwĩ táí jéihbipna caá. Pánih jéihnit, caán ã jummat pah muntih, jwiítbut jwĩ jummat pínahdih jwĩ jéihna caá. <sup>3</sup> Det Jesucristo ã jwúub dei júúwát pínahdih pãinitboó yéj chäj cádahnit, ã táí chäjat pah muntih ï túut nuumná caá.

<sup>4</sup> Nihat yéj chäjnit Dios ã wútatdih yap yohnit caá. Dedé yéj chäjat Dios ã wútatdih yap yohat ã jumna caá. <sup>5</sup> Cãacwã ï yéj chäjatdih yohni pínah Cristo ã cãac jummatdih ñi jéihna caá. Caánboodíh yéejat wihcan caá.\* <sup>6</sup> Ded Cristo biíc dih jumni páantjeh ã yéj chäjca bojo naáh. Obohjeéhtih, ded yéj chäj cádahcan, Cristodih jéihcan, ãih nihcan caá. <sup>7</sup> Wã oinitá, yeebdíh yeenitdih ñi joyáh bojoó. Nihat táí chäjnit Jesucristo yoobópdih ã

\* **3:1** Jn 1.12      \* **3:5** Jn 1.29

jumat pah muntih, queébtut yoobópdih ñ juma caá.  
 8 Obohjeéhtih, yéej chājniboó nemépwā ñ maáih ã juma caá. Nemépwā ñ maáh bácah, biíhmahjeh yeejép chājni caá. Páant ã chājatdih yoh beedani pínah Dios wūh nin baácboó át cãac jumap tajī.\*

9 Det Dios weh juma, jwī íp Dios ã jenah joyát pah queétdihbut át jenah joyát túutap taga. Pánih jenah joinít, ã wēpat ñjeéh ã jumachah, páantjeh ñ yéej chājcan niít. 10 Nin pah Dios weh, nemépwā ñ maáh wehbut ñ jumatdih ñi jéihbipna caá: Túi chājcanit, ñ déewādih oicannit Dios weh nihcan caá. Nemépwā ñ maáh weh ñ juma caá.

### *Jesúhwā ñ míc oyat*

11 Yeéb Jesucristodih jwíh jepahnit, “Míc oyat caá náahap”, jwī niij bohéatdih ñi joyóp jī.\* 12 Caín ã jumatji pah ñi jumca bojoó. Caán nemépwā ñ maáih juma, ã úddih át mao yohop wat jī. ¿Dépanih tigaá ã úddih át mao yohji? ñi jenah joyóchah. Caandih yeebdih wã naóhbipna caá. Caín yéej chājni juma, ã údboó túi chājni ã jumatdih íjnit, caandih át mao yohop wat jī.\*

13 Páant tigaá yéej chājnitboó yeebdih ñ eníhcan caá. Pánihna, ñ en jūihñuchah, “¿Dépanih tigaá weemdih ñ en jāih?” ñi niij jenah joicá bojoó. 14 Yeejép chājnit, iiguípna bejnit pínah jwī jumap yuh jī. Obohjeéhtih, buu jeáboó bejnit pínah juma, túiniboodih túut nūmná caá jwī chājap. Jesúhwādih oina, jwiítidih ã túut nūmátidih jwī jéihna caá. Ded cãacwādih oicanni iiguípna bejni pínah ã juma caá.\* 15 Ded ã déedih eníhcan, mao

\* 3:8 He 2.14-15 \* 3:11 Jn 13.34; 15.12 \* 3:12 Gn 4.8 \* 3:14 Jn 5.24

yohíhat jenah joyát caá caandíh ã jum̃ap. Pánih jum̃na, Dios ã enechah, cãacdi h mao yohni bíc yoobó ã jum̃na caá. “Ded mao yohni Diosjeéh páantjeh ã jum̃can níit”, ñi níj jéihna caá. <sup>16</sup> Ded pah oyat ã jum̃atdih nin pah jwĩ jéihna caá: Jwiít dih búdí oina, Diosjeéh páantjeh jwĩ jum̃at pínah níijná, Jesucristo jwiít dih ã w̃an w̃uh̃p jĩ. Páant ã w̃an w̃ahatdih náhninit, “Caán oyat yoobát caá”, jwĩ níj jéihna caá. Pánihna, jwiítbut w̃anna yuh̃na, jwĩ déewãdih túi oinit, teo wáacat caá náahap.\* <sup>17</sup> Dawá bíi dée bíbohni, ã dée panihni moh yéejnidih enna yuh̃na, caandíh jĩgah en teo wáaccan, Diosdih ã oican caá. <sup>18</sup> Pánihna, wã weh panihnitá, “Bitadih wã oina caá”, níijná, jacjeh pohba níjcat caá náahap.

### *Um̃canjeh, Diosjeéh jwĩ jum̃at*

<sup>19</sup> Cãacwãdih túi oina, Dioíhwã jwĩ jum̃atdih jwĩ jéihna caá. Pánihna, ã peéh chãjat pínahdih um̃canjeh, ãjeéh jwĩ túi jum̃na caá. <sup>20</sup> “Yéejat jíib weemdíh ã jum̃na nacaá”, jwĩ níj jenah joyóchah yuh̃na, Dios ni hatdih jéihni jum̃na, jwĩ jenah joyát dihbut ã túi jéihna caá. Pánih jéihna, ãihwã jwĩ jum̃atdih jwĩ túi jenah joyát pínah níijná, jwiít dih ã teo wáac bipna caá. <sup>21</sup> Wã oinitá, “Dios wã yéejatdih ãt yoh tagaá”, níj jenah joinít, um̃canjeh, Diosjeéh jwĩ túi jum̃na caá. <sup>22</sup> Pánih jum̃nit, Dios ã w̃atdih jepahna, ã weñat pínahdih jwĩ chãjachah, caandíh dedé jwĩ w̃abát dih jwiít dih ã w̃ahbipna caá. <sup>23</sup> Nin pah jwiít dih ã w̃atna caá: “Wã w̃uh̃ Jesucristodih túi jenah joinít, bita ãihwãdihbut ñi

---

\* **3:16** Jn 15.13



oyoó”, ãt niijíp wut jĩ.\* 24 Dios ã wutatdih táí jepahnitboó ãjeéh ĩ táí jamna caá. Dios ĩjeéhbüt ã táí jamna caá. “¿Dios wãjeéh ã jam niít?” jwĩ niij jéihíhichah, Dios jwiít dih ã wãhni Túini Espíritu “Jújũh, Dios majeéh ã jamna caá”, ã niij jéihyana caá.

## 4

### *Cristodih eníhcannitdih ded pah jwĩ jéihyat*

1 Wã oinitá, “Túini Espíritu weemdih nin pah ã niij naáwát túutna caá”, niij yeenit, dawá ĩ jamna caá. Pánihna, Dios ã naáwát túutni ã jamatdih jéihyat túut niijná, ded pah ã naáwát dih ñi táí joyoó. Dios naáwát biíc yoobó ã naóhcah, ñi joyáh bo-joó. 2 Yoobóp dih Túini Espíritu ã naáwát túutni nin pah ã niij naóhbiipna caá: “Jesucristo jwiít panihni cáac jamna yuhna, Diosjeh ãt jamup wut jĩ”, ã niijbípna caá. Páant niijni Dios ã wahní ã jamna caá. 3 Obohjeéhtih, nemépwã ĩ maáh ã wahniboó, “Jesús Dios nihcan caá”, ã niijbípna caá. Páant niijni Dios ã wahní nihcan, Cristodih en jũihniíh caá. Cristodih en jũihniíhwã dawá ĩ jamat pínah doonádih ñitát joi tágaá. Bũũ nin baácboó dawá ĩ jamna caá.\*

4 Obohjeéhtih, yeébbó, wã oinitá, Dioíhwã ñi jamuchah, Túini Espíritu ñijeéh ã jamna caá. Jesús dih jepahcannit, nemépwã ĩ maáh ã wēpat chah, Túini Espíritubó ã wēpna caá. Pánihna, yeebdih ĩ yee naáwáchah yuhna, caán ã wēpatjĩh queétdih yap yohnit ñi jamna caá. 5 Queétboó Dioíhwã nihcah, ĩ bohéatbüt Dioíh nihcan caá. Bitá

\* 3:23 Jn 13.34; 15.12,17      \* 4:3 Mt 7.15; 2Jn 7

Dioih nihcannit, i bohéatdih i túi wēi joiná caá.\*  
 6 Obohjeéhtih, Dioihwā jumna, ā naáwátidih jwī bohénachah, āihwāboó jwiítidih i túi wēi joiná caá. Diosdih jéihcannitboó, jwī naáwáchah, i joíihcan caá. Pánihna, Dios naáwátidih ded yoobópdih bohéni, ded yee bohéni ā jummatdih ñi jéihbipna caá.\*

### *Dios oini caá*

7 Wā oinitá, oyat wēpat Dios jwiítidih ā wūhuchah, bita āihwādih jwī oi jīh. Det bitadih túi oinit Dios weh i jumna caá. Pánih jumnitjeh Diosdih jéihnit, ājeéh i túi jumna caá. 8 Dios oini ā jumuchah, bitadih oicannit, Diosdih jéihcan, ājeéh i jumcan caá. 9 Dios ā wūh biíc jumnidih nin baácboó át wah deyanap tajī, ā wēpatjīh Diosjeéh wēnit, páantjeh jwī jummat pínah niijná. Pánih chājna, ded pah ā oyatdih jwiítidih át jéihyanap tajī.\* 10 Oyat yoobát nin pah caá ā jumap: Diosdih jwī oyat pah nihcan, jwiítidih Diosboó ā oyat pah caá oyat yoobát ā jumap. Jwiítidih bádí oinit, jwī yéejat jīb iiguipna bejat déejidih túi ubat túut niijná, Dios ā wūhdih át wun wūhat túutap wut jī.

11 Wā oinitá, Dios jwiítidih caan páh bádí ā oyochah, jwiítbut túi míc oyat caá náahap. 12 Nihat Diosdih encannit jwī jumna caá. Obohjeéhtih, jwī míc oyochah, Diosjeh jwījeéh ā jumna caá. Páant ā jumuchah, ā náah yacat pah ā oyatjīh bitadih jwī túi teo wáacna caá.\* 13 Dios jwiítidih āih Táini Espíritudih át wūhap taga. Páant jwījeéh ā jumuchah, “Dios biícidih wā jumna caá. Wājeéh caanbút ā jumna caá”, jwī niij jéihna caá.\* 14 Jwī

\* 4:5 Jn 15.19 \* 4:6 Jn 8.47 \* 4:9 Jn 3.16 \* 4:12 Jn 1.18

\* 4:13 Ro 8.9; 1Jn 3.24

Íip ã wãúhdih nin baácboó ãt cãac jummat túutup tajĩ, cãacwãdih ã túi ubat pínah niijná. Páant ã cãac jummat túutnijidih jwiítjeh jwĩ enep jĩ. Pánih ennitji, bitadiah jwĩ jéih naóhna caá.\* <sup>15</sup> “Jesús Dios wãúh caá”, niijnjeh Diosjeéh ã túi jumna caá. Diosbut ãjeéh ã túi jumna caá.

<sup>16</sup> Dios jwiítidih ã oyatdih jwĩ jéihna caá. Pánih jéihnit, caandih jwĩ túi jenah joiná caá. Dios nihat cãacwãdih búdí ã oina caá. Pánihna, ded bitadiah oini Dios biícidih ã jumna caá. Diosbut ãjeéh ã jumna caá. <sup>17</sup> Pánih Dios biícidih jumna, caandih, bitadiahbut jwĩ túi oina caá. Pánih oina, cãacwã ï yéejat jíib peéh chãjat yeó jáapdih úumcanjeh, jwĩ túi jumnipna caá. Cristo ã íip Dios biícidih ã jumuchah, jwiítbut nin baácboó jum jwuhna, biíc yoobó caán biícidih jwĩ jumna caá. Pánih jumnit, ã jwúub dei júúwúchah, jwĩ úumcan níit. <sup>18</sup> Ded Diosdih oini ã oyatdihbut jéihna, caandih ã úumcan níit. Pánih túi oina, jwĩ oinidih jwĩ úumcan caá. Obohjeéhtih, biíhdih úumna, caán ã peéh chãjat pínahdih jwĩ úum jenah joiná caá. Pánihna, jwĩ úumnidih jwĩ oican caá.

<sup>19</sup> Dios jwiítidih ã oi waáwáchah, jwiítbut caandih, bitadiahbut jwĩ jéih oina caá. <sup>20</sup> Ded ã dée panihnidih eníhcan, “Weém Diosdih wã oina caá”, niijná yuhna, ã yeena caá. Biíhdih enna yuhna, ã oican, Dios ã enca naáhdih ã jéih oican caá. <sup>21</sup> Pánihna, nin pah jwiítidih Jesucristo ã níj wutup jĩ: **“Ded Diosdih oina, ã dée panihnidihbut oyat caá náahap”**, ã niijíp jĩ.\*

\* **4:14** Jn 3.17      \* **4:21** Mt 5.44-45; Mr 12.29-31

## 5

*Dios weh yéejatdih ï yap yohat*

<sup>1</sup> Det Jesúsdiñ “Dios ã wahni Cristo caá”, ni-ijnít, Dios weh ï jumna caá. Det jwĩ íp Diosdih túi oinit, ã wehdihbut ï oina caá. <sup>2</sup> Diosdih oina, ã wuatdih jepahnit, ã wehdihbut jwĩ oyat yoobópdih ã jummatdih jwĩ jéihna caá. <sup>3</sup> ã wuatdih jepahnajeh, Diosdih jwĩ túi oina caá.\* Caandih oina, jwiít dih ã wuat wái náah jumni nihcan caá.\* <sup>4</sup> Det Dios weh jumna, yéej chãjatdih ï jéih yap yohna caá. Jesucristo ã wēpatdih túi jenah joiná, Diosdih jéihcannit ï jenah joyát pah, jwĩ jenah joicán niít. <sup>5</sup> “Jesús Dios wũúh caá”, niñ jenah joiníjeh yéejatdih náahcan, ã yap yohna caá.

*Dios wũúh ded pah ã jummat*

<sup>6</sup> Jesucristo nin baácboó ãt cãac jumup tajĩ. ã tewat pínah jãtñh, Juan Daabánidih ã daabáát túutup jĩ. Túttimah, cruzboó wan wũhna, ãñh meépdih ã yohop jĩ. Pánihna, mahjñh ã daabáát dih, cruzboó ãñh meép ã yohatdihbut náhninit, Dios wũúh ã jummatdih jwĩ jéihna caá. Túini Espíritubut “Nin Dios wũúh tigaá”, jwiít dih ã niñ jéihyana caá. Caán Túini Espiritu yeecan, yoobópdih naóhni caá. <sup>7-8</sup> Pánihna, Jesús Dios wũúh ã jummatdih nit biíc peihcannit jéihyanit ï jumna caá: Túini Espiritu jwiít dih ã jéihyanachah, mahjñh ã daabáátjidiñ, ãñh meép ã yohatjidiñbut jenah joinít, Jesús Dios wũúh ã jummatdih jwĩ jéihna caá. <sup>9</sup> Cãacwãjeh ï naáwáchah joiná, “Caán yoobópdih tigaá”, jwĩ ni-ijná caá. Páant niijnít dih jwĩ joiná yũhna, jwĩ

\* 5:3 Jn 14.15; 2Jn 6      \* 5:3 Dt 30.11; Mt 11.30

lip ã wũúhdih naóhna, cãacwã ï naáwát chah ã jumachah, caánboodih túi joyát caá náahap.\* <sup>10</sup> Dios wũúhdih ded túi jenah joiní “Jesús Dios wũúh ã jummat dooná yoobópdihi tigaá”, ã niij jéihna caá. Obohjeéhtih, Dios ded pah ã wũúhdih ã naáwát dihi joyáh bojni “Dios yeeni caá”, ã niijná caá. <sup>11</sup> Nin pah Dios jwiít dihi ã niij jéihyana caá: “Wã wũúhdih túi jenah joinít, páantjeh wãjeéh ñi jummat bipna caá”, ã niijíp jĩ. <sup>12</sup> Dios wũúh Jesúsdih ded túi jenah joiní, Diosjeéh páantjeh ã jummat na caá. Obohjeéhtih, ded Jesúsdih jepahcanni, Diosjeéh ã jummat can niít.\*

*Juan ã pée naáwát*

<sup>13</sup> Yeéb Dios wũúhdih túi jenah joinít dihi naóh daácna caá wã chãjap, páantjeh Diosjeéh ñi jummat pínah dihi ñi jéihyat pínah niijná.\*

<sup>14</sup> Dios ã náahat pah caandíh jwĩ úbúchah, jwiít dihi ã joyát dihi jwĩ túi jéihna caá. Pánih jéihna, úmcanjeh caandíh jwĩ úbhna caá. <sup>15</sup> Páant ã joyát dihi jéihna, “Wã úbát dihi át wũh tagaá”, jwĩ niij jéihna caá.\*

<sup>16-17</sup> Yeéb ñi dée panihni ã yéej chãjachah ennit, Dios dihi ñi úbú, ã yéejat jíib caandíh iiguípna ã wahcat pínah niijná. Páant ñi úbúchah, Dios caandíh ã túut numbípna caá, ãjeéh páantjeh ã jummat pínah niijná. Obohjeéhtih, ded Cristodih páantjeh náahcan, yap yohnit, áihwá dihi bat eníhcan, iiguípna ã bejbipna caá. Pánih niboodíh ñi úbát pínah dihi wã wutcan caá. Nihat yéej chãjat Dios dihi yap yohat míic caá. Obohjeéhtih, biíh yéej chãjat

\* **5:9** Jn 5.32-37; 8.18    \* **5:12** Jn 3.36    \* **5:13** Jn 20.31    \* **5:15** Mt 7.7-11; Lc 11.9-13; Jn 15.7,16; 16.23-24; 1Jn 3.21-22

iiguípna ã bejat túatcan caá. Pánih chãjnitdih caá úúbat náahap, ã túut nuumát pínah niijná.

<sup>18</sup> Dios wááh Jesús áihwãdih ã túi en daoná caá, nemépwã ã maáh queétdih ã yéejacat pínah niijná. Pánihna, “Dios weh páantjeh ã yéej chãjcan caá”, jwĩ niij jéihna caá. <sup>19</sup> “Jwiitboó Dioíhwã jwĩ jumna caá. Obohjeéhtih, nihat Diosdih náahcannitdih Satanás caá ã wutup”, jwĩ niij jéihna caá. <sup>20</sup> “Dios wááh nin baáboó cãac jumnit, Dios yoobátdih jwĩ jéihyat pínah niijná, jwiitdih ã jéihyanap jĩ”, jwĩ niij jéihna caá. Pánihna, Diosjeéh túi jumnit, ã wááh Jesucristojeéhbüt jwĩ túi jumna caá. Jesucristo Dios yoobát jumna, páantjeh Diosjeéh jwiitdih ã túi jummat túatna caá.\* <sup>21</sup> Wã weh panihnitá, jñi túi chãja chaáh! Pãpnidih ñi wëi úúbhca bojoó.

Páant bóojeh tigaá wã naáwát.

Juan

---

\* 5:20 Jn 17.3

## **Dios ã jáap naáwát tólih New Testament in Cacua**

copyright © 2008 Wycliffe Bible Translators, Inc.

Language: Cacua

Translation by: Wycliffe Bible Translators, Inc.

### **Copyright Information**

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Cacua

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

---

PDF generated using Haiola and XeLaTeX on 11 Nov 2022 from source files  
dated 29 Jan 2022  
34c9543b-57a6-5290-ab7b-4fa15529a7e2